


**TEZAUUR LITURGIC**  
**24 NOIEMBRIE**  
**ANASTASIE CHESTORUL**

**CANONUL**  
**SF. IERARH-MUCENIC**  
**CLEMENT I,**  
**EPISCOPUL ROMEI**



**CODEX SINAITICUS GR 638**



# Канон святаго священномученика Климента, Папы Римскаго

## Творение Анастасия квестора

### Песнь 1, глас 8

**Ирмос:** Колесницегонителя Фараона погрузи:

Богоносный Христов чиноначальник ныне уставльшася торжества ко трапезе лучшей и тления вышшей с высоким проповеданием созва. Приидите, сладости насладимся.

Иже во глубины Писаний Духа в Божественном Дусе всеблагочестивым разумом благоговейно приникающаго, и отуду неизреченное извлекающаго ведение божественное, Климента воспоим, словесы благочестно увенчаим.

Истины святаго проповедника священнаго сего торжества имеюще чиноначальника, егоже благодать постави от иже суровыя подвиги прешедших и до крове, придите, радости приобщимся.

**Богородичен:** Преславная возглаголашася о Тебе в родех родов, Бога Слова во чреве вмещшая, чиста же пребывши Богородице Марие. Темже Тя вси почитаем, сущее по Бозе заступление наше.

### Песнь 3

**Ирмос:** Утверждей в начале небеса:

Тя к сиянию Чистыя Трисолнечныя светлости Петр возведе, исполнь ученьми божественными и богомудрыми, ихже от источника перваго Спаса

почерпе.

**Богоносне**, к Петрови любовию возгоревся, познав еллинскаго учения гнилую лесть, сетью проповедания увязен показался еси, языки уловляя благодатию.

**Красное** украшение и лепотное знает тя, богоносе, и венец доброты, и часть неотъемлему тоя, Церковь, тебе плетуши венечными пеньми похвалы, блаженне.

**Грозд** зрелый, в точило мучений ввержен бысть добропобедный Христов страстотерпец, и сладость жизни источая, исполняет верных сердца радованием благодати.

**Богородичен:** Херувимов и Серафимов превышши явилася еси, Богородице: Ты бо Единая прияла еси Невместимаго Бога во Твоем чреве, Нескверная: темже Тя вернии вси песньми, Чистая, ублажаем.

#### **Песнь 4**

**Ирмос:** Ты моя крепость, Господи, Ты моя и сила: Устнама твоима премудрости поток излился, слово неоскудное рекою испущая, и сам благословения исполнился еси, дивне, мечем учений твоих изгоняя и посекаяя, блаженне, иноплеменное безумие.

**Истинная** и живоносная лоза тя изращает, Иисус Господь, в Нем пребывающую, мудре Клименте, и язв болезнью очищену, яко грозд благочестия Богу принесся еси созревший и огня прещения вышший.

**Подвижник**, во узилищи образуя аки наковальню, приемля ударения и лютых наведение, в сладость непщева огня стремление непостоянное жизни ради истинныя и Царствия, еже улучи благодатию Духа.

**Богородичен:** Ты верных похвала еси, Безневестная, Ты Предстательница, Ты и прибежище христиан, стена и пристанище, к Сыну Твоему мольбы носиши, Всенепорочная, и спасаеши от бед верою и любовью Богородицу Чистую Тебе знающих.

### **Песнь 5**

**Ирмос:** Вскую мя отринул еси:

Яко правило истины, развращенная сердца исправил еси, пременения неразумная правомудрыми твоими ученьми исправляя и увещаая истинных держатися заповеданий, и лжи отступати.

Служитель благоразумный апостолов, от тех Первозванного образ быв, и ревность стяжал еси божественную, и престола священнаго предсидание, яко пастырь истинный, восприял еси.

Познав истинный, богомудре, благочестия путь, себе обращал еси всякий раз всеумро, подвижаяся и страсть низлагая суеты вещественныя, словесы истины и дела.

**Богородичен:** Матернее дерзновение, еже к Сыну Твоему имущи, Всечистая, сроднаго промышления, еже о нас, не презри, молимся, яко Тебе и Едину христиане ко Владыце очищение милостивно предлагаем.

### **Песнь 6**

**Ирмос:** Бездна грехов и прегрешений мя смущает: Познася и далече сущим пастыря благодать, сияние убо слова, верно простирающесе, мучителя дух тем паче возмущаше на изгнание осудити блаженнаго.

**М**оре пророчески отступить Слово показа, израильтяном заутра путь уготовляющее, твоим же священным мощем святым покланяющимся, воды его отыдоша.

**В**озможе страдалец ловчих сетей избежатьи и Божественныя крепости силу призва, и Помощник крепость ту вдохну во иерарха, и низложи супостата.

**Богородичен:** Милостива мне Судию и Сына Твоего, Богородице Дево, Твоими мольбами быти в День Суда, избавителя же лютых, Мати, сотвори: к Тебе бо Единой надежды возлагаю.

## **Песнь 7**

**Ирмос:** Божия снисхождения огонь устыдеса: Паству, Господи, каплями из твоего ребра мудро составил еси и болезнями страстотерпцев паки приумножил еси, юже сохранить до конца Отец благоволи от всякаго искушения, яко Преплагий.

**Ц**епию честное иерарха тело обязано бысть аки монистом неким, удушаем же хваляшеса страстотерпец, вопия Сотворшему: Благословен Бог отец наших.

**М**ученик изнемогаше, болезнями оболчен, обаче ныне неизреченныя насладитися славы сподобися. И со дерзновением вопиет Сотворшему: Благословен Бог отец наших.

**Богородичен:** Всем убо Господа, Единого же Единому Единородному Сыну православно Отца богословяще, Тя возвещаем, и Единого ведяще, от Тебе исходяща Духа праваго, соестественна и соприисносущна.

## Песнь 8

**Ирмос:** Седмерицею пещь халдейский мучитель:  
Ветхий Рим градодержца и похвалу, и благочестия  
твердое основание ты богомудро воспита, и Херсонесу  
предаде стража тому быти и избавителя, страданьми  
украшившуся и ракою мощей твоих,  
священнотаинниче, истины проповедниче.

**Увы,** честней твои стопе, благочестия поборниче, иже  
нечестием зловонно содержимии узами одеяша; та  
убо с тобою погребенныя, благодати источают и  
болезни исцеляют, и разрешают тяготы, и лучшая  
подают, силою Иже вся премудро Устрояющаго.

**Священнодействитель** благодати волею паче  
украшается, себе беззаконным предав. Заклан бысть  
яко агнец, пастырь истиннейший от дел явився, яко  
жертва, за народ пожертая.

**Троичен:** Трисветлое Божество, Едину сияющее зарю  
от Единого Триипостаснаго Естества, Родителя  
Безначальна: Единоестественно же Слово Отцу, и  
Сцарствующаго Единосущнаго Духа, дети  
благословите, священницы воспойте, людие  
превозносите во вся веки.

## Песнь 9

**Ирмос:** Ужасеся о сем небо:

**Да** избавлюся от прегрешений моих, Царю Небесный,  
молитвами Климента, емуже дал еси жития моего  
всегда соблюдение, тяготу страстей разрешати, силу  
подавати, к лучшим приводити, сопротивных же  
удаляти нас.

**Ужасашеся** чудеси верных множество, яко виде

предивно естество, влагу поядующее вод и путь  
изходящым разсекающее, якоже мощей рака чудная  
покланяема бысть, и слава возсылашеся Богу нашему.  
**П**ознася твоя кончины священное к Богу отшествие,  
блаженне, и к Тому с лицом радующимся и чистым  
изволением течаше, болезней множицею мзду прияв и  
почесть, множество трудов превосходящее воздаяние.  
**М**ученика Слова и подражателя страстем Его почтим,  
и к нему руки наша прострем, возлагающе попечение  
сие, и примем с небесе того предстательство, от  
всякаго искушения избавляющее воспевающих его.  
**Богородичен:** Явилася еси, о Дево Мати Божия, паче  
естества рождши в телеси благое Слово, Егоже Отец  
отрыгну от сердца Своего прежде всех век, яко Благ.  
Егоже ныне и телес превышша разумеем, аще и в  
тело облечеся.

[Выкладываю в «Уставные заметки» один из  
рукописных канонов в честь святого  
священномученика Климента I, Папы Римского.  
Канон был написан квестором Анастасием,  
византийским гимнографом и мелодом, жившем в  
конце IX и начале X веков. Греческий текст  
сохранился в рукописи XIII века из собрания  
Синайского монастыря — **Sinait. gr. 638, лл. 156 об.  
– 161.** Перевод с греческого **Наталии Бахаревой**]

